



KENYATAAN MEDIA

KEMENTERIAN KESIHATAN MALAYSIA

PELANJUTAN PENGISYTIHARAN MALAYSIA SEBAGAI KAWASAN TEMPATAN JANGKITAN DAN KEMASKINI PROTOKOL COVID-19

29 JUN 2023

Susulan kenyataan yang dibuat oleh Pertubuhan Kesihatan Sedunia (WHO) pada 5 Mei 2023 lalu berkenaan status COVID-19 yang tidak lagi menjadi Kecemasan Kesihatan Awam Yang Menjadi Kepentingan Antarabangsa (*Public Health Emergency of International Concern - PHEIC*), Kementerian Kesihatan Malaysia (KKM) telah membuat semakan semula dan mengemas kini prosedur operasi standard (SOP) berdasarkan penilaian situasi semasa jangkitan COVID-19 di Malaysia.

Walaupun beberapa kelonggaran kepada SOP COVID-19 telah diberikan ketika Fasa Peralihan dari pandemik COVID-19 yang bermula sejak 1 April 2022, KKM terus melaksanakan pelbagai polisi dan aktiviti kawalan dan pencegahan COVID-19 bagi mengekang penularan jangkitan COVID-19 dalam kalangan komuniti.

Sejak lima (5) minggu kebelakangan ini (bermula ME 21/2023 sehingga ME 25/2023), bilangan kes baharu COVID-19 telah menunjukkan penurunan sebanyak 53.5% (5,801 kes kepada 2,698 kes) dan kes kematian COVID-19 juga menunjukkan penurunan sebanyak 35.3% (17 kes kepada 11 kes). Dari segi kapasiti hospital pula, jumlah kemasukan pesakit COVID-19 ke hospital awam dan pengisian katil fasiliti COVID-19 menurun, manakala peratus pengisian katil Unit Rawatan Rapi (ICU) kekal stabil pada 6.0 peratus pada ME 25/2023 berbanding ME 24/2023.

Sehingga 27 Jun 2023, sebanyak 16,337,744 (50%) penduduk Malaysia telah menerima dos penggalak pertama dan 2.5 peratus (825,275) sahaja telah menerima dos penggalak kedua.

Justeru, berdasarkan pencapaian dalam pengurusan pandemik COVID-19 di Malaysia yang telah berjaya mengekang penularan jangkitan COVID-19 dan memulihkan perkhidmatan kesihatan negara, KKM telah membuat semakan semula SOP dengan merujuk kepada kenyataan WHO berkaitan transisi pengurusan jangka masa panjang pandemik COVID-19. Antaranya adalah seperti berikut:

1. SOP pemakaian pelitup muka yang dahulunya diwajibkan ke atas pesakit COVID-19, semasa berada di dalam pengangkutan awam (kecuali kapal terbang) dan di fasiliti kesihatan, telah dikemas kini mengikut ketetapan berikut dan berkuat kuasa mulai 5 Julai 2023; iaitu:

- Individu **DIKEHENDAKI** memakai pelitup muka bagi:
 - i. kes positif COVID-19; dan

- ii. ketika berada di fasiliti kesihatan mengikut amalan Kawalan dan Pencegahan Infeksi semasa berhadapan atau mengendalikan pesakit.
- Pemakaian pelitup muka **AMAT DIGALAKKAN** berdasarkan penilaian sendiri bagi:
 - i. **Individu berisiko tinggi** seperti warga emas, individu dengan penyakit kronik, individu dengan imuniti rendah atau ibu mengandung terutama ketika berada **di tempat sesak dan di mana pengudaraan kurang baik**;
 - ii. **Individu yang bergejala respiratori** bagi mengelakkan jangkitan kepada orang lain; dan
 - iii. Semasa berada dalam **perkhidmatan pengangkutan awam** seperti bas, kereta api, kapal terbang, teksi termasuk perkhidmatan *e-hailing*, bas/van pekerja dan bas/van sekolah.

2. Prosedur pengasingan kes disahkan COVID-19

- **Arahan pengasingan kes disahkan COVID-19 diteruskan** dengan tempohnya **dipendekkan dari tujuh (7) hari kepada lima (5) hari** dari onset gejala pertama. Ini adalah berdasarkan kajian yang mengatakan bahawa infektiviti kes COVID-19 tinggi pada lima (5) hari pertama dari onset gejala dengan *viral load* yang tinggi pada tempoh tersebut. Ia berkuat kuasa mulai 5 Julai 2023.

3. Pelanjutan Pengisytiharan Kawasan Tempatan Jangkitan

- Walaupun penilaian situasi semasa COVID-19 adalah pada tahap tidak membimbangkan dan perkhidmatan kesihatan tidak terbeban dengan situasi COVID-19, status Kawasan Tempatan Jangkitan di Malaysia yang akan tamat pada 30 Jun 2023 **dilanjutkan untuk tempoh enam (6) bulan lagi, iaitu sehingga 31 Disember 2023.**
- Ia bagi membolehkan penguatkuasaan beberapa peruntukan di dalam Peraturan-peraturan Pencegahan dan Pengawalan Penyakit Berjangkit (Langkah-Langkah di Dalam Kawasan Tempatan Jangkitan) (Pelan Pemulihan Negara) (Fasa Peralihan ke Endemik) 2022 [*P.U.(A) 83/2022*] yang digubal atas kuasa Menteri di bawah subseksyen 11(2) Akta Pencegahan dan Pengawalan Penyakit Berjangkit 1988 [*Akta 342*].
- Pelanjutan pengisytiharan Malaysia sebagai “Kawasan Tempatan Jangkitan” juga masih diperlukan memandangkan terdapat risiko kemunculan varian dan subvarian baharu virus SARS-CoV-2 di Malaysia. Selain itu, perhimpunan ramai yang dijangka berlaku semasa sambutan Hari Raya Aidil Adha dan juga Pilihanraya Negeri, berkemungkinan berisiko menyumbang kepada peningkatan kes dan membebankan sistem perkhidmatan kesihatan Kerajaan jika langkah kawalan dan pencegahan tidak dilaksanakan sepenuhnya.

Kementerian Kesihatan akan terus memantau situasi COVID-19 dan juga varian yang dilaporkan untuk mengambil tindakan segera dan wajar apabila diperlukan. KKM juga ingin menasihatkan orang ramai untuk terus mengamalkan kawalan sendiri yang baik seperti yang diamalkan pada masa ini, termasuk memastikan kebersihan diri bagi mengelakkan dari dijangkiti penyakit berjangkit termasuk COVID-19. Orang ramai perlu memikul tanggungjawab individu yang lebih besar bagi melindungi bukan sahaja diri sendiri, tetapi seluruh komuniti terutamanya golongan berisiko tinggi.

YB Dr. Zaliha Binti Mustafa
Menteri Kesihatan Malaysia

29 Jun 2023